

**Napparsimasut illersuisuannik pilersitsinissamut Inatsisissatut siunnersuuteqaqqullugit
Naalakkersuisut peqquneqarnissaannik Inatsisartut aalajangiiffigisassaattut
siunnersuut.
(Siumut gruppi)**

pillugu

Ilaqtariinnermut Peqqissutsimullu Ataatsimiititaliap

siunnersuutip aappassaaneerpeqarnissaanut

ISUMALIUUTISSIISSUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Mala Høy Kúko, Siumut, siulittaasoq
Inatsisartunut ilaasortaq Anna Wangenheim, Demokraatit, siulittaasup tullia
Inatsisartunut ilaasortaq Doris J. Jensen, Siumut
Inatsisartunut ilaasortaq Dines Mikaelson, Siumut
Inatsisartunut ilaasortaq Mikivuk Thomassen, Inuit Ataqatigiit
Inatsisartunut ilaasortaq Edvard Nielsen Aronsen, Inuit Ataqatigiit, sinniisussa
Inatsisartunut ilaasortaq Mette Arqe-Hammeken, Naleraq

UPA2024-imi 2. maj siullermeerinninnerup kingorna siunnersuut ataatsimiititaliap misissorpaa.

Siunnersuutip imarisaa siunertaalu

Napparsimasut illersuisuat pillugu Inatsisartut inatsisissaattut Naalakkersuisut aalajangiiffigisassatut siunnersuummik saqqummeeqquneqarput. Napparsimasunut ilaqutaannullu atugassarititaasut pillugit erseqqissaasoqarnissaannik pisariaqartitsineq siunnersuuteqartup siunnersuummini tunngavilersuutigaa. Tamatuma saniatigut napparsimasunut saaffiginnittarfimmik, inatsisitigut paasitinneqarnissamut saaffiginniffiusinnaasumik qulakkeerisoqarsinnaaqqullugu.

Siunnersuutip Inatsisartunit siullermeerneqarnera

Siunnersuut assigiinngitsumik tiguneqarpoq. Peqqinnissaqarfimmulli unammillernartutigit atukkat nalinginnaasut pillugit, aamma napparsimasut illersuisuannik pilersitsinissamut tapersersuineq akerliunerlu pillugit oqallilluartoqarpoq. Tamatuma saniatigit napparsimasut illersuisuata suliassat suut isumagisassanerau pillugit oqallittoqarpoq.

Naalakkersuisut allannguutissatut siunnersuut imaattoq saqqummiuppaat:

”UPA 2025 sioqqullugu aaqqissuussinernut pilersinneqareersimasunut atatillugu napparsimasut illersuisuata sunik suliaqarnissaanut akisussaaffeqarnissaanullu tunngatillugu Naalakkersuisut innersuussutinik saqqummiusseqqullugit peqquneqarnissaannut Inatsisartut aalajangiiffigisassaattut siunnersuut”.

Aammattaq Demokraatit allannguutissatut siunnersuut imaattoq saqqummiuppaat:

”Inatsisartut aaliangiiffigisassaattut siunnersuut, peqqinnissaqarfimmi siunnersuisartut ikinnerpaamik marlunnik amerlineqarnissaat, siunertaralugu pisinnaatitaaffinnik aqutissiuunneqarnissaq aammalu napparsimasutut saaffissaqarnissaq, tassanngalu ataaseq Danmarkimi peqqissartut illuanni (DgP) atorfinitsinneqassasoq, qitusoqarfimmiilli immikkut ittumik meeqqanut ilaqutariinnullu siunnersuisartussamik peqalernissaat, Naalakkersuisut suliniummik aallartitsinissaannut peqquneqassasut. Siunnersuutip akuerineqarnerani piaartumik suliniut piviusunngortinnissaanut suligasuortoqassaaq”.

Tamanna tunngavigalugu immikkoortoq ataatsimiititaliamit suliarineqartussanngorlugu innersuunneqarpoq.

Siunnersuutip aningaasatigit kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassasut.

Taamaalilluni siunnersuutip piviusunngortinnissaanut aningaasatigit kingunerisassai siunnersuummut naapertuuttut ataatsimiititaliap maluginiarpaa, taamaalillunilu Utoqqaat illersuisuanut aningaasartuutaasut amerlaqataat aningaasartuutissatut naatsorsuutigineqarput. Tassa ukiumut 1.813.000 kr.-nit, tamatumalu saniatigit AC-fuldmægtigip ukiumut akissarsiassai 500.000 kr.-iusut aningaasartuutaassapput.

Ataatsimiititaliap siunnersuummik suliarinninnera

Aallarniutitut napparsimasut sumiiffimmik saaffiginniffigisinnaasaminnik pisariaqartitsinerat ataatsimiititaliap paasivaa. Aamma siullermeerinninnermi oqallinneq ataatsimiititaliap attuumassuteqarluinnartutut isigaa. Tassunga atatillugu Naalakkersuisut akissuteqaatiminni allassimasaattut periarfissanik pioreersunik peqarnera ataatsimiititaliap maluginiarpaa.

Naalakkersuisut allannguutissatut siunnersuutaata kingunerissavaa UPA2025 sioqqullugu aqqissuussinernut pioreersunut atatillugu napparsimasut illersuisuata sunik suliaqarnissaanut akisussaaffeqarnissaanullu tunngatillugu Naalakkersuisut innersuussuteqassasut. Siusinnerusukkut iluserisaa eqqarsaatigalugu Naalakkersuisut allannguutissatut siunnersuutaat aqputigalugu napparsimasut illersuisuannik pilersitsinissaq siunertaralugu inatsisitigut suleriaqqinnissamut innersuussisoqassanersoq paasiuminaappoq. Imaluunniit periarfissat pioreersut sanilliunneqaannarnersut aammalu napparsimasut illersuisuannik aqqissuteqarnissami qaleriittoqassanersoq qulaajarneqassasoq.

Demokraatit allannguutissatut siunnersuutaata kingunerissavaa Naalakkersuisut siunnersuisartunik ikinnerpaamik marlunnik amerlineqarnissaat siunertaralugu pisinnaatitaaffinnik aqputissiuunneqarnissaq napparsimasunullu saaffissaqarnissaq pillugu suliniummik aallartitsinissamut peqqusinissaq. Allanguutissatut siunnersuummi Kalaallit Peqqissartut Illuanni atorfinittisisoqassasoq aamma peqqinnissaqarfimmi meeqqanut ilaqutariinnullu qitiusumik immikkut saaffissamik sulilersitsisoqassasoq. Siunnersuuttip siusinnerusukkut iluserisaa eqqarsaatigalugu Demokraatit allannguutissatut siunnersuutaanni siunertaasoq siunnersuutaqaartumi siunertarineqartoq assigaa, tassa napparsimasunik siunnersuisartunik arlalinnik sulilersitsisoqassasoq, taamaattorli periarfissani pioreersuni amerlanerusunik sulilersitsisoqarnissaa assigiinngissutaalluni.

Ataatsimiititaliap inassuteqaatai

- Ataatsimiititaliami amerlanerussuteqartut Inuit Ataqatigiinneersut, Siumumeersut aammalu Demokraatineersut Demokraatit allannguutissatut siunnersuutaat akuersissutigineqassasoq inassutigaa.
- Tamatuma saniatigut Kalaallit Peqqissartut Illuanni napparsimasunik siunnersuisartup oqaatsitigut kulturikkullu paasisimasaqartuunissaa Naalakkersuisunit qulakkeerneqarnissaa ataatsimiititaliap kaammattuutigaa.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Mala Høy Kúko
Siulittaasoq

Anna Wangenheim
Siulittaasup tullia

Doris J. Jensen

Dines Mikaelen

Mikivsuk Thomassen

Edvard Nielsen Aronsen

Mette Arqe-Hammeken